

Kapisilinniarneq pillugu Namminersorlutik Oqartussat nalunaarutaat

Aalisarneq pillugu Inatsisartut Inatsisaanni nr. 18, 31. oktober 1996-imeersumi, § 5, § 8, § 10, § 10a, imm. 1, § 13, imm. 2, § 23, § 25, § 26, § 33, imm. 2 aamma § 34, imm. 3, ilaatigut Inatsisartut Inatsisaanni nr. 6, 20. maj 1998-imeersukkut, Inatsisartut Inatsisaanni nr. 5, 21. maj 2002-meersukkut, Inatsisartut Inatsisaanni nr. 28, 18. december 2003-meersukkut, Inatsisartut Inatsisaanni nr. 17, 3. december 2009-meersukkut, Inatsisartut Inatsisaanni nr. 12, 3. december 2012-imeersukkut, Inatsisartut Inatsisaat nr. 18, 3. juni 2015-imeersukkut kiisalu kingullermik Inatsisartut Inatsisaatigut nr. 28, 28. november 2016-imeersukkut allangortinneqarsimasut tunngavigalugit aalajangersarneqarpoq:

Kapitali 1

Atuuffia nassuiaatilla

Attuuffii

§ 1. Nalunaarut una Kalaallit Nunaata aalisarnikkut oqartussaaffigisaani kapisilinniarnermut atuuppoq:

- 1) Nunap Isuata kitaani NAFO-p sumiiffilersuiffiani 1-imi ingerlanneqartumut atuuppoq. Tunngaviusumik killigititami 40 sømilit avataanni aalisarneq inerteqqutaavoq.
- 2) Kalaallit Nunaata Kangiata aalisarfini. Paragraffit tulliuttut kisimik atuutissapput, tassalu § 6, § 7, § 8, § 9, § 10, § 11, § 12, § 13, § 14, § 15 aamma § 16. Tunngaviusumik killigititami 12 sømilit avataani kapisilinniarluni aalisarneq inerteqqutaavoq.

Nassuiaatit

§ 2. Inuussutissarsiutigalugu kapisilinniarneq nalunaarummi matumani paasineqassaaq pisat tamaasa ilaannaasaluunniit tuniniarnissaat siunertaralugu kapisilinniarnerut.

Imm. 2. Inuussutissarsiummut atatinngu kapisilinniarneq nalunaarummi matumani paasineqassaaq nammineq atugassanik kapisilinniarnerut.

Imm. 3. Kapisilinnik pisineq nalunaarummi matumani paasineqassaaq inunnit kapisilinniarmissamut akuersissummik allagartaqartunit toqqaannartumik pisineq tiguserlu.

Kapitali 2

Inuussutissarsiutigalugu kapisilinniarneq

Inuussutissarsiutigalugu kapisilinniarnermut piumasaqaatit

§ 3. Inuussutissarsiutigalugu kapisilinniarnissamut akuersisummik allagartallit kisimik kapisilinnik tuniniaasinnaatitaapput.

§ 4. Inuussutissarsiutigalugu kapisilinniarsinnaanermut allagartat akuersissutit Naalakkersuisunit tunniunneqassapput.

Imm. 2. Allagartat imm. 1 naapertorlugu akuersissutit qinnuteqartunut piumasaqaatinik makkuninnga naammassinnittunut taamaallaat tunniussisoqarsinnaavoq:

- 1) Qinnuteqartoq inuiaqatigiinnut kalaallinut attuumassuteqavissoq, tak. aalisarnek pillugu Inatsisartut Inatsisaanni § 3, imm. 4.
- 2) Qassutitik kapisilinniutitik aamma angallammik kapisilinniummik 12,8 meterit (42 fod) tikillugit tamakkerlugu angissusilimmik qinnuteqartoq nammineq pigisaqartoq.
- 3) Qinnuteqarnermut atatillugu qinnuteqartumit pigineqartut qassutit kapisilinniutit qassiunerinik qanorlu ittuunerinik imaluunniit ilisarnaataannik nalunaaruteqartoq.
- 4) Qinnuteqartunut aalisarnerup siuliani akuersisummik peqarsimasunut aalisarnerup siuliani nalunaaruteqartussaataaneq pillugu §§ 9 aamma 16 naapertorlugu naammassinnissimassapput, taamaattoq takuuk § 18, imm. 3.

Inuussutissarsiutigalugu kapisilinniarnermi piniutit

§ 5. Uku atorlugit inuussutissarsiutigalugu taamaallaat kapisilinniartoqarsinnaavoq:

- 1) qarsorsat, imaluunniit
- 2) qassutit tasillugit minnerpaamik 140 mm-inik nigartallit atorlugit. Qassutit tissukartittakkat atorneqarsinnaapput, taamaattoorli atuineri ataatsimi amerlanerpaamik uiguleriit 20-kkutaarlugit.

Imm. 2. Qassutit nigartaat uuttorneqassapput uuttuutit $\frac{1}{2}$ kiilumik oqimaalutserlugu nigartamut ikkuneratigut nakkartinneratigullu. Qimiaa puttalatitsisoq atuarlugu nigartat 20-t qimiaanut ungaseqatigiit uuttorneqassapput. Nigartat tamarmik imm. 1-imi piumasaqaat eqqortissavaat.

Imm. 3. Qassutit kapisilinniutit atorneqartut tamarmik piginnittup aqqanik imaluunniit taassuma angallataata normuanik nalunaaqutsersugaassapput. Nalunaaqutsiineri atorneqartoq imermi allannguajaatsuusaaq.

Imm. 4. Silap pissusaata taamaattoqartissinnaappagu qassutit kapisilinniutit akuttunngitsumik akulikitsumillu qassusiarfigineqartassapput, pisat atorluarneqarsinnaanissaat ajornerulertussaajunnaarlugit.

Inuussutissarsiutigalugu kapisilinniarnernup aqunneqarnera

§ 6. Inuussutissarsiutigalugu kapisilinniarneq pisassiissutit aallaavigalugit nunami tunitsivinnut tunisassanik imaluunniit najukkani kalaalimineerniarfinnut tuniniarneqartussanik aalisarnertut ingerlanneqarsinnaavoq.

Imm. 2. Illoqarfinni imaluunniit nunaqarfinni kalaalimineerniarfeqanngitsuni, suliffeqarfinnut toqqaannartumik tunisineq ingerlanneqarsinnaavoq.

§ 7. Aalisarnermut § 6 malillugu Naalakkersuisut ukiut tamaasa, nunat tamalaat akornanni isumaqatigiissutit mianeralugit, Kalaallit Nunaanni kapisilittassanik aalajangersaasassapput.

Imm. 2. Naalakkersuisut KNAPK-lu isumasioqatigereerlugu inuussutissarsiuutigalugu kapisilinniarnissamut piffissat ilaannut ataasiakkaanut ulloq aallartiffissaq aalajangertassavaat. Ulloq aallartiffia nuna tamakkerlugu tusagassiutit aqqutigalugit nalunaarutigineqartassaaq.

Imm. 3. Inuussutissarsiuutigalugu kapisilinnik aalisarnek ulloq aalajangiiffigineqartoq sioqqullugu aallartinneqassanngilaq.

Imm. 4. Inuussutissarsiuutigalugu kapisilinniarneq taamaallaat pisassatut aalajangerneqartut, aalisakkat uumatillutik uuttuutaattut (ilivitsuutillugit) kiilunngorlugit taaneqartut, iluanni pisinnaavoq.

Imm. 5. Inuussutissarsiuutigalugu kapisilinniarnermi pisat Kalaallit Nunaata avataani taamaallaat pisiariortorneqarsinnaapput tuniniarneqarsinnaallutillu Naalakkersuisut akuersissuteqarnerisigut.

§ 8. Kapisilittassiissutit aalajangikkat tamakkerlugit pisinneqarnissaat qanillippat, Naalakkersuisut nalunaarutigissavaat, qaqugu inuussutissarsiuutigalugu kapisilinniarneq kiisalu taamatut aalisarnermit pisanik pisineq aamma tunisineq unissanersoq.

Imm. 2. Imm. 1 malillugu nuna tamakkerlugu tusagassiutit aqqutigalugit nalunaarutigineqartassaaq.

Imm. 3. Aalisarnek unitsinneqarpat, tak. imm. 1, inuussutissarsiuutigalugu kapisilinniarneq kiisalu taamatut aalisarnermit pisanik pisiortorneq tunisinerlu inerteqqutaalissapput.

Inuussutissarsiuutigalugu kapisilinniarnermi pisanik nalunaaruteqartarneq

§ 9. Kapisillit pisinneqartut tamarmik Kalaallit Nunaanni Aalisarnermik Akuersissutinik Nakkutilliisoqarfimmut (KANUAANA) nalunaarutigineqassapput.

Imm. 2. Tunisat imaluunniit akigineqartut amerlassusii "niaquernagit erlaveerlugit" nalunaarutigineqarpat naatsorsueriaaseq 1,11 atorineqassaaq aalisakkat ilivitsunngortillugit naatsorsorneranni.

Imm. 3. Inuussutissarsiuutigu aalisarnissamut akuersissutillit kalaalilimineerniarfinni toqqaannaq tunisisartut tulaassinerit tamaasa nalunaaruteqartassapput. Nalunaaruteqarnermi kapisillit pisat tamarmik ilaatinneqassapput. Pisat pillugit nalunaarutiginninneq nalunaarummi ilanngussaq 1 atorlugu pisassaaq. Pisat pillugit nalunaarutiginninnissaq uunga nassiunneqassaaq KANUAANA, Postboks 501, 3900 Nuuk, Telefax 34 63 60 imaluunniit e-mailikkut gflk@nanoq.gl kapisilinnik tikiussinerit kinguninngua pisassaaq.

Kapitali 3

Inuussutissarsiummut atatinngu kapisilinnik aalisarnermi pisanik nalunaaruteqartarneq

Inuussutissarsiummut atatinngu kapisilinnik aalisarnek

§ 10. Inuussutissarsiummut atatinngu kapisilinniarnissamut akuersissut qinnuteqareernikkut Naalakkersuisunit tunniunneqartassaaq.

Imm. 2. Imm. 1 malillugu allagartat akuersissutit qinnuteqartunut piumasaqaatinik makkuninnga naammassinnittunut tunniussisoqarsinnaavoq:

- 1) Aalisarneq pillugu Inatsisartut Inatsisaanni § 8, imm. 1-imi piumasaqaatinik naammassinnissimasut.
- 2) Qinnuteqartunut aalisarnerup siuliani akuersissummik peqarsimasunut aalisarnerup siuliani nalunaaruteqartussaaitaaneq pillugu §§ 15 aamma 16 naapertorlugu naammassinnissimassapput, taamaattoq takuuk § 18, imm. 3.

Inuussutissarsiutiginnagu kapisilinniarnermi piniutit

§ 11. Inuussutissarsiummut atatinngu uku taamaallaat atorlugit kapisilinniartoqarsinnaavoq:

- 1) qarsorsat, imaluunniit
- 2) qassutit (ataatsit) 2000-inik qilernillit, taakkua tasillugit nigartaat minnerpaamik 140 mm-iusut.

Imm. 2. Qassutit nigartaat uuttorneqassapput uuttuutit $\frac{1}{2}$ kiilumik oqimaalutserlugu nigartamut ikkunneratigut nakkartinneratigullu. Qimiaa puttalatitsisoq atuarlugu nigartat 20-t qimiaanut ungaseqatigiit uuttorneqassapput. Nigartat tamarmik imm. 1-imi piumasaqaat eqqortissavaat.

Imm. 3. Qassutit kapisilinniutit piginnittut aqqanik nalunaaqutserneqarsimassapput. Nalunaaqutsiinnermi atorineqartoq imermi allannguatsuussaaq.

Imm. 4. Silap pissusaata taamaattoqartissinnaappagu qassutit kapisilinniutit akuttunngitsumik akulikitsumillu qassusiarfigineqartassapput, pisat atorluarneqarsinnaanissaat ajornerulertussaajunnaarlugit.

Inuussutissarsiutiginnagu kapisilinniarnernup aqunneqarnera

§ 12. Inuussutissarsiummut atatinngu kapisilinniarneq pisassiissuteqarnikkut ingerlanneqarsinnaavoq.

§ 13. Inuussutissarsiummut atanngitsunik, tak. § 12, Naalakkersuisut ukiut tamaasa, nunat tamalaat akornanni isumaqatigiissutit mianeralugit, Kitaani kapisilittassanik aalajangersaasassapput.

Imm. 2. Inuussutissarsiummut atatinngu kapisilinnik aalisarneq inuussutissarsiutiginnagu aalisarnerup aallarteqatigissavaa, takuuk § 7, imm. 2.

Imm. 3. Inuussutissarsiummut attuumassuteqanngitsumik kapisilinniarneq taamaallaat pisassatut aalajangerneqartut, aalisakkat uumatillutik uuttuutaattut (ilivitsuutillugit) kiilunngorlugit taaneqartut, iluanni pisinnaavoq.

§ 14. Kapisilittassiissutit aalajangikkat tamakkerlugit pisarineqarnissaat qanillippat, Naalakkersuisut nalunaarutigissavaat, qaqugu inuussutissarsiutiginnagu kapisilinniarneq unissanersoq.

Imm. 2. Imm. 1 malillugu nuna tamakkerlugu tusagassiutit aqutiginnagu nalunaarutigineqartassaaq.

Imm. 3. Aalisarneq unitsinneqarpat, tak. imm. 1, inuussutissarsiummut atatinngu kapisilinniarneq inerteqqutaalissapput.

Inuussutissarsiummut atatinngu kapisilinnik aalisarnermit pisanik nalunaaruteqartarneq

§ 15. Inuussutissarsiummut atatinngu kapisilinnik aalisarnermi kapisillit pisarineqartut tamarmik KANUAANA-mut nalunaarutigineqassapput.

Imm. 2. Pisat pillugit nalunaarutiginninneq nalunaarummi ilanngussaq 1 atorlugu pisassaaq. Pisat pillugit nalunaarutiginninnissaq uunga nassiunneqassaaq KANUAANA, Postboks 501, 3900 Nuuk, Telefax 34 63 60 imaluunniit e-mailikkut gflk@nanoq.gl kapisilinnik qassutit qassusiarfigineqarnerisa kinguninngua pisassaaq, tak. § 11, imm. 4.

Kapitali 4

Inuussutissarsiutigalugu aamma inuussutissarsiummut attuumassuteqanngitsumik kapisilinniarnermi pisaqanngitsoornerit nalunaarutigineri

§ 16. Inuussutissarsiutigalugu kiisalu inuussutissarsiummut attuumassuteqanngitsumik kapisilinniarnissamut akuersissutaatillit tamarmik kapisilinniarsimanngitsut tamanna pillugu ilanngussaq 1 atorlugu nalunaarutigissavaat.

Imm. 2. Inuussutissarsiutigalugu kiisalu inuussutissarsiummut attuumassuteqanngitsumik kapisilinniarnissamut akuersissutaatillit tamarmik kapisilinniarsimasut, kapisilinnillu pisaqarsimanngitsut, tamanna pillugu ilanngussaq 1 atorlugu nalunaarutigissavaat.

Imm. 3. Akuersissutinik atorneqanngitsunik pisaqanngitsoornerillu nalunaaruteqarneq nalunaarummut ilanngussaq 1 aqutigalugu pissaaq. Taamatut nalunaarutiginninnissaq ukioq aalisarfusumi kingusinnerpaamik 1. december uunga nassiunneqassaaq KANUAANA, Postboks 501, 3900 Nuuk, Telefax 34 63 60 imaluunniit e-mailikkut gflk@nanoq.gl.

Kapitali 5

Pineqaatissiinerit

§ 17. § 1, nr. 1) aamma nr. 2), § 3, imm. 1, § 4, § 5, imm. 1, imm. 3, aamma imm. 4, § 7, imm. 3, 4 og 5, § 8, imm. 3, § 9, § 10, imm. 1, § 11, imm. 1, imm. 3, aamma imm. 4., § 13, imm. 3, § 14, imm. 3, § 15 aamma § 16-imik unioqutitsinerit Kalaallit Nunaanni Pinerluttulerinermik Inatsit naapertorlugu akiliisitsinermik kinguneqarsinnaapput.

Imm. 2. Inatsisilerinermi immikkoortut inuttut isigineqarsinnaasut pinerluttulerinermut inatsimmi malittarisassat malillugit imm. 1-imut ilaapput.

Imm. 3. Imm. 1 aamma 2 malillugit suliat Kalaallit Nunaanni Eqqartuussivimmut suliaqartussatut siullertut suliakkiutigineqassapput.

Imm. 4. Akiliisitsissutit imm. 1-3 malillugit pineqaatissiisutiginetartut Nunatta Karsianut pisassanngortinneqassapput.

Kapitali 6

Atortuulersitsineq, atorunnaarsinneqarnissaa kiisalu ikaarsaariarnermi aalajangersakkat

§ 18. Nalunaarut una atortuulissaaq 24. septembari 2018-imi.

Imm. 2. Peqatigitillugu Namminersorlutik Oqartussat kapisilinniarneq pillugu nalunaarutaat nr. 2, 10. august 2018-imeersoq atorunnaarpoq.

Imm. 3. § 4, imm. 2, nr. 4 aamma § 10, imm. 2, nr. 2-mi piumasaqaatit 2019-imut taakkulu kingorna piffissani aalisarfulersussani akuersissutinik tunniussiniarnermi atuutissapput.

Namminersorlutik Oqartussat, ulloq 21. septembari 2018

Erik Jensen

/

Jørgen Isak Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut